

西北史地丛书【第三辑】

考

西征续录

方希孟 | 等著



中国国际广播出版社

西北史地丛书【第三辑】

考

西征续录

方希孟 | 等著

中国国际广播出版社

图书在版编目（CIP）数据

西征续录 / 方希孟等著. —北京：中国国际广播出版社，2016.1
（西北史地丛书第三辑）

ISBN 978-7-5078-3778-0

I. ①西… II. ①方… III. ①游记—西北地区—民国 IV. ①K928.94

中国版本图书馆CIP数据核字（2014）第278775号

西征续录

著 者	方希孟等
责任编辑	杜春梅
版式设计	国广设计室
责任校对	徐秀英
出版发行 社 址	中国国际广播出版社（83139469 83139489[传真]） 北京复兴门外大街2号（国家广电总局内） 邮编：100866
网 址	www.chirp.com.cn
经 销	新华书店
印 刷	北京艺堂印刷有限公司
开 本	710 × 1000 1/16
字 数	200千字
印 张	15
版 次	2016年1月 北京第一版
印 次	2016年1月 第一次印刷
书 号	ISBN 978-7-5078-3778-0 / K · 261
定 价	32.00 元

CRP

中国国际广播出版社

欢迎关注本社新浪官方微博

官方网站 www.chirp.cn

版权所有
盗版必究

“西北史地丛书”第三辑出版说明

清朝中叶以降，随着国势衰退和社会矛盾的日益突出，大批学者开始关注西北史地的研究，先后涌现出祁韵士、俞正燮、徐松、龚自珍、何秋涛等一大批研究西北文化、关注西北史地的知名学者。他们从内忧外患的社会背景出发，提出了许多珍贵的思想和建议，形成了丰富、可观的西北史地文献。这些著作中，不乏对西北各地丰富的历史地理的记述、对有关地区历史问题的独特看法，亦有强国富民、解决西北民族矛盾的大胆建议。

当前，西部大开发正如火如荼地展开，百余年前中华民族先贤们留下的智力遗产有了再次发光发热的阵地。为此，我社组织有关专家，精心遴选了部分价值较高的作品，加以整理，改换成横排简体，加上新式标点推出，奉献给读者，希望为西部大开发贡献绵薄之力。

本丛书依据我社所选的原著版本进行整理、编辑，对原版中明显错讹处（文字、标点、印刷问题），径予改正，不再出注；对原版中只有句读、没有标点的，则按当今标点符号使用规范予以标点。

由于时代的原因，原作品中不可避免地夹杂有较多对西北少数民族的不尊重词汇和评价。本社在整理过程中，对其中少量无关宏旨的内容做了删除，并用“……”替代；对于其中如“回乱”、“回匪”、“回子”、“回逆”、“缠回”等词汇，由于直接修改会与原文的语境不合，且有违古籍整理相关规范，

故都予以保留，请读者朋友们在阅读使用时留意鉴别。疏漏之处，还请读者不吝指正。

中国国际广播出版社

2015年12月

目 录

万里行程记（祁韵士著）	001
东归日记（方士淦著）	021
荷戈纪程（林则徐著）	031
莎车行记（倭仁著）	051
西征续录（方希孟著）	075
抚新记程（袁大化著）	127
北草地旅行记（李德贻著）	193

万里行程记

祁韵士 著

西戍之役，余以乙丑二月十八日自京师启行，阅两六月，至七月十七日始抵伊江。时经一百七十余日，路经一万七百余里，所见山川城堡、名胜古迹、人物风俗及塞外烟墩、沙碛，一切可异可怖之状，无不周览遍历、系于心目。每憩息旅舍，随手疏记，投行篋中。时日既久，积累遂多，亦自不复记忆矣。抵戍后，暇日无事，或愁风苦雨，独坐无聊，偶检零缣碎片，集而省阅，以寄情怀。略加编缀，遂尔成篇。余籍隶寿阳，其自京师至寿阳十日程，素所熟游，不复札叙。只就西行所未经者，起自太安驿，讫于伊江，一路程途里数及景物大略，分注如下，以志远游之迹，抑使他日东归，可按册而稽焉。

京师至寿阳九百八十五里。由寿阳西行，七十里至太安驿。驿为寿阳西南境，四面皆高阜，驿居其中如井，韩文公诗亭在焉。西有五峰山，山上出泉，冬夏不溢不涸，谓之龙池。明时，郭雨师居之，遇旱，祷雨辄应；龙神最灵，碑言“五祷五”应云。

由太安西南行，三十五里至什贴镇，入榆次县界。再三十五里至王湖镇，此榆次北境最大之镇也。前此驿路皆在山中，登陟者以马瘡为叹；至是，乃就平坦，西望川原无际，太原境内之山为之一开。

由王湖西行，三十里至永康镇。镇亦榆次所辖，居民引水溉田，流经村落屋宇间，活活可爱。

由永康西行，四十里至徐沟县。县北郭外，为赴太原省会之路。其地，水咸苦，不耐茶饮。

西行四十里至贾令镇。镇隶祁县，旧有驿，今裁。民居多以砖为楼房，原野修整，力于耕作。

西行二十里至祁县。以春秋时祁大夫食邑得名。再五十里至平遥县。县

民服贾者多，城中麇肆纵横，街衢皆黑壤，有类京师，盖人烟稠密之故。

西南行，三十里至张兰镇。镇为介休县所辖，城堞完整，商贾丛集，山右第一富庶之区，然风气奢靡，路旁竟有乞食者，非复从前景象矣。

西行四十五里至介休县。县南有绵山、狐岐山之胜，北有汾水环抱，地势最为雄厚。太原境内之山，至此一合。县东十里，汉郭有道墓在焉，蔡中郎所书碑已亡，今存者，傅青主所摹。祠前汉槐尚茂，大数十围，真神物也。将抵县，路旁有文潞公故里碑。

由县西行，出义棠镇，折而南行，入山。五十里至两渡镇。此灵石北境也。两面山势绵亘，汾水迳其中，如带。山上村居，楼阁层叠，宛如图画。

南行四十里至灵石县。县以瑞石得名，石在城北门外。

南行，登山，十里至韩侯岭。将至岭，见山畔有小祠，俗呼夫妻庙。盖虬髯遇卫公夫妇地也。石蹬盘空而上，数十转，路益陡峻。策马至山巅，红垣缭绕，为汉淮阴侯墓。前有祠宇，颇宏整。下马入拜谒。壁间诗甚夥，大抵当道者驻节所题。侯死长安，不解何以葬此。阅古碑，则云：吕后既诛信，函首送代，适高帝还师，驻蹕此山，遂命瘞之，后人为起冢焉。

由岭南下，三十里至仁义镇。镇为灵石南境，在韩侯岭之下，形如釜底。

南行六十里至霍州。仁义一线，路行万山中。午憩后，登所谓逍遥岭者，虽土质无石，而陡峻与韩侯岭南北相埒，回首若屏障。行半日许，稍辗转就平地，抵霍州。州为古彘县地。霍山雄峙东南，高出霄汉，苍翠欲滴，即霍太岳也。

由霍州南行，二十里至辛置镇。又三十里至赵城县。路绕汾曲，越数土陁，四围山势，至此一开。

南行三十里至洪洞县。初入县境，路旁大书“山川明媚”四字于坊额，旋见沟塍方罫，春树云林，芳霭氤氲，青葱满目，气象明秀，为晋中第一。闻绕郭皆种荷花，自多佳趣。有聚瑞桥，惜余方春过此，未睹其胜。路旁有明韩忠定文故里碑。又余始祖河东公，本此邑大槐里人，明初，徙居寿阳。今访大槐里，竟无知者。盖逆旅主人，不足知之。匆匆一宿，未暇再访，以

俟他日。

由县南行，六十里至平阳府。府城在平原突高处，为古帝旧都，股肱大郡。年来，适遇岁歉频仍，风物颇形萧索，不称游者之望。城外有尧井。

南行六十里至史村驿。驿隶太平县。太平在府西南，孔道所不到，割此驿归太平，为往来供亿计耳。将至史村，山畔有题“巢父洗耳处”者，不觉哑然一笑。惟豫让桥在襄陵、太平两界之间，差可据耳。王阮亭谓在赵城，误也。又，中途有文中子故里碑。汾水从霍州流经平阳，时时与行人相触，怒涛惊驶，至此不见，盖折而西矣。

由史村南行，四十里至高县镇。镇为曲沃县所辖。直隶省栾城、获鹿所出棉花、布匹，贩运者皆卸集于此，商旅甚多。

南行三十里至侯马驿，亦曲沃所辖。曲沃县治在其东北，即春秋时新田，晋都也。自平阳南来，土肥饶而民淳厚，村堡云连，景象雄阔，有陶唐氏之遗风。凡平阳境内之山，至此又稍一合。

南行二十里至隘口铺。又西南行，二十里至东镇。出侯马，渡浍水，登冈陇，但不甚峻。高阜之田，其平如盘，层层映绿，极可观。镇隶闻喜县。

西南行，四十里至闻喜县。县城小而地势开敞，土厚水深，为晋旧都。中条山袤延东南数百里，蜿蜒如龙。道左多石碣，率皆表扬贞节德教之所为，风俗近古。裴晋公祠亦在道旁。北来山势，至此又稍一开。

西南行，四十里至水头镇。水即涑水。镇有桥，水经其下西流。此镇隶夏县，司马文正公故里也。

西南行，五十里至北向镇。三晋云山皆北向，镇其取此而名欤？地为安邑县北境，闾阎极繁盛。

南行，三十里至油村镇。镇为油聚之所，繁盛不减北向，猗氏县所辖也。

西南行，三十里至樊桥驿。驿隶临晋县，地近蒲州，人民俱带朴野气，非复平阳富饶景象，若汾州、太原则愈华矣。此大略也。

西南行，三十里至高翁镇，亦隶临晋。蒲州境内，麦田中柿树成阴，于麦无碍，仍芄芄长发。柿产最多，土人用以酿酒及醋，味薄不足尝。

西南行，四十里至寺坡底。路自霍州迤迤趋下，至此，则下益甚，地气益暖。将至寺坡，见古柏森森，欹生山畔，极有致。山上有寺，土人云即所谓普救寺，此地距蒲州城一里许。贸茶者价颇廉，西行人多携之。自闻喜山势开后，东南青嶂，层出怀抱，萦绕而前，直至蒲州始尽，以黄河为之限，折而东走，不复合矣。路旁有明杨襄毅博故里碑。

由寺坡过蒲州，南行五十里至可河。从蒲州城南沮洳中登山麓，循之南行，抵辛店。遥见长虹西亘，如在天半，御者告余曰：“此黄河也。”已而，入土岭中行，不复见。至可河，村落甚小。又见华山仙掌，耸出天表，西南青苍之气咄咄逼人，觉心目为之一爽。洎临河滨，仰观潼关，倚水突起，壁立千仞。其下，洪流怒号，滔滔而来，令人又生怛怖！余过此，在三月念四日，夕阳西坠，天色如墨，呼船急渡，幸风力差微，篙楫无惊。夜漏初下，始叩关焉。山、陕二省以黄河为界，河东为山西，河西为陕西，雍、冀之分，自古然矣。

计自可河南行二十里至潼关。关自汉以后始著。秦时所谓函谷关，在此关之东，今澠池境也。秦关百二，潼关为首，雄壮莫比。未入关，疑其矗立之势，若车不得方轨、马不得连骑者，比至，乃宽然有余。堂皇大路，若履平地，直西而行，殊非意料所及。地阻，山中极高而气候极暖，亦奇。

西行四十里至华阴县。自潼关迤西，官柳夹道，如界画然，乃知“两行秦树直”良非虚语。长安道上，按辔徐行。缅怀百代兴亡，千秋歌咏，皆同云烟过眼，转瞬辄空。惟见太华、芙蓉，终日争奇竞秀于前，目不暇给。双轮西转，山逐车行，滴翠拖蓝，扑人眉宇，流连爱慕之情，不得已已。华阴县里，无数绿柳，阴浓成衙，徙倚女墙，隐现林表，絮飞遍地如雪，真仙境也。县在华山之麓。城东五里有华岳庙，毕中丞所建，颇宏壮。此地在汉为弘农，路旁有汉杨太尉震墓碑。

由华阴西行，七十里至华州。尝阅华山图，为之神往。今亲履其地，饱看山色，马上车中，有流览卧游之乐。山之高峻，所谓“只有天在上，并无山与齐”，其言确甚。然乘驿看山，终未一一领略，他时再过，当蹑履畅游也。州亦在华麓。城东为郭汾阳故里，有祠宇。

由华州西行，五十里至渭南。县居渭水之隈，青畴绿野，四望无涯。西行四十里至零口镇。春日赛会，游女如云。西行二十里至新丰镇。尚存古名。再二十里至临潼县。县倚骊山下，万松苍然，城近始见。山半行馆，楼槛萦回，擅泉石之胜，天然佳妙。温泉一泓，自石罅喷玉而出，汇为数池。解衣就浴，尘氛顿尽。因忆开、宝华清，风流如昨，而《霓裳》一曲，舞破太平，为惘然者久之！

西行三十里至灞桥。灞岸为昔人赠别之地，杨柳依稀，感人离绪不浅。独讶其何以无桥，土人曰：浊流迅驶，曾为桥，辄圯，不能成也。

西行二十里至西安府。长安形势，虎踞龙蟠，自古帝王之都。城外八水环流。抵东郭，始见百雉崔巍，远则无睹。盖林阜包罗，最为雄厚。忆昔史所载，此城名大兴城，隋时所筑，始徙都之。隋以前皆都咸阳，即今咸阳县。客为余言：唐雁塔在城南，岁歉，则塔中分为二，却不倾；岁丰则仍合焉。城中多售竹器，询皆出自盩厔、鄠县云。计自京师至西安，共二千四百八十里。

西行五十里至咸阳县。过泮水桥渡渭，至咸阳，秦汉故都也。城郭未见宏阔，自非旧基。出北门，上峻坂，古冢累累，慨然叹古之豪杰，不知青山埋却多少矣。县有孔道二：西行为入川路，西北行为入甘路。

四十里至店张驿。驿隶兴平县，县在其南。

西行三十里至醴泉县。原隰宽平，土脉膏润。唐太宗昭陵在县南，惜未往一谒。

西行四十里至乾州。此地在唐为奉天，高宗陵在州北。

西北行，五十里至监军镇，乾州所辖。唐时多以宦官监军，称军容使，此犹有旧名。

西北行，四十里至永寿县。冈阜漫衍，愈上愈高，隘口中开，县当其缺。怪岭之上，有塔巍然，下瞰城中，一览而尽。

西北行，四十里至太峪，邠州所辖。永寿在高冈之上，循坂上下，路甚纡曲。涉流泉，抵太峪。复登土岭，峻甚，索费马力。既登，则四望悉平，盖极高之地不见其高。久之，又下峻坂，是为邠州——范文正公旧治也。由太峪西

北行，三十里至邠州，古豳地。自永寿至邠州，人民皆穴土而居，“陶复陶穴”遗风，至今未改。盖土性坚，可耐久。他地为之，则将压焉。州城傍南山，下包平地，势如龙。馆中牡丹甚茂。邠西十数里有明岨山，甚奇。山之顶皆土，其趾乃皆石。洞穴玲珑，不可胜数，备诸佛像。沿山前进，桑枣成林，矮而秀茂，郁郁葱葱，令人思“斧斫”、“远扬”之句。又行十余里，见石龕中大佛，高八丈五尺，就山石雕成，亦奇。

由邠州西行，四十里至亭口镇，亦邠州辖。陕省一带堡堞，与河东大略相同。永寿以西则无堡，惟有土屋。至甘省隆德以西，乃又有堡，过兰州，则堡益多，所过驿亭，无不有堡。盖地近边，官为之，与民间自筑者不同矣。

由亭口西北行，四十里至长武县，县在高冈上。自咸阳登陇，至醴泉、乾州，路稍平。抵永寿，乃高峻岭路，时上时下。至邠州又平，自邠州西北行则又高。长武为最高处，视之乃成平地，四不见山。然偶有坎窞，则皆深沟高垒，天造地设，处处如是。客或语余：“此地即白起坑赵卒处。”夫赵，远都邯郸，长平之战，即今高平县，地近上党，而乃驱卒四十万，坑于咸阳之北二三百里外，恐无是理，其谬不待辨也。

由长武西行，四十五里至瓦云驿。驿为甘肃泾州辖，乃陕、甘二省分界处也。

西行六十里至泾州。瓦云趋泾，将下峻坂，见西来一峰插天，圆秀可玩，又见群峦缭绕，烟树苍茫，极有致。次日访之，则汉时所谓回中也。西王母宫在其麓，有宋·陶谷碑。城倚山临水，形胜最佳。西有泾、汭二水，清流映带，心为洒然。因忆泾渭清浊，聚讼纷纷，《诗》言“泾以渭浊”，是泾水本清，因渭而浊，注家误解耳。今观泾水清甚，足验其误。

由泾州西行，三十里至王庄，泾州所辖。州境桑枣成阴，田园润泽，风景绝类邠州。

西行四十里至白水驿，驿为平凉县辖。自驿以东，未见有妇女当垆者，至是始有之。

西行七十里至平凉府。府城雄峻，泾水流其南。康熙间，叛将王辅臣据其地，

久不下，文襄公图海由虎山墩俯瞰城中，得其虚实。辅臣穷蹙乃降。余昔纂史，记其事，今虎山墩在城北，文襄祠在城东郭外。城西南皆山，崆峒山在焉。崆峒凡有五，非一地。此为黄帝访道广成之所，太史公所游也，时有玄鹤，翔舞山中。平凉之名，仿于古之高平第一。晋时南凉、西凉、北凉，皆在今甘、凉二州之境，远在河西，与此陇东无涉。

西行四十里至安国镇，平凉县辖。平凉西行人山，气象萧疏，山势渐合渐高。

由安国西行，五十里至瓦亭驿。此宋时所谓瓦亭关也，今隶固原州，州在驿西北。未至瓦亭二十里许，两山夹峙如门，仅容一辙转侧而过，水啮山根漉漉然，险要莫比。过此，则嵯峨万仞，叠起云间。循涧前进，如坐井观天。山高日落，路修马疲，人亦惫甚。

由瓦亭西行，二十里至六盘山。自瓦亭行十余里曰和尚坡，为六盘之麓。余晨兴到此，微雨初零，土人以泥滑，阻余莫前，仆者恃其勇不听，遂登。路曲折，陡峻如壁。盘磴而上，愈上愈高。始犹土石相错，虽泞，尚可行。至山半——俗呼猫儿坪，有帝君庙，甚巍焕。新凿之路，皆土复石上，遇雨淖甚。已而，雨愈大，泥愈深，胶粘阻辙，色紫黑。雨忽变为雪，济之以风，烈甚。仆马阻峻坂下，屡起屡仆，寸步不能前。余乃舍车而骑，鼓勇直上。雪花大如掌，风乃益狂，翻扑人面如织。身在风雪阵中，若腾云雾而起，目迷口噤，马亦股栗。望山巅有旧驿亭，驰往避。及下马入，亭朽，被撼欲倒，岌岌不可留。乃复乘马，陡下千丈坡，踏冰雪凿凿有声。迤邐至杨家店，路稍平，有茅屋数家可憩，解衣烘焉。少顷，雪复变为雨。回视山头，皆白气缭绕，不复辨。计此程五十里，上山下山只二十里耳，而仓皇狼狈一至于此！次日，行李始度岭追至。晚无枕寝，独坐达旦，此岂天之所以窘余也耶！然亦殆矣幸矣。

由六盘帝君庙西行，过岭，三十里至隆德县。县为陇西第一冲要之地，景色荒凉特甚，而羯鼓红牙，歌喉宛转，四邻几遍。风俗淫靡，为之慨然！

西行四十五里至神林铺，隆德所辖。

西行四十五里至静宁州，宋韩魏公治兵防夏于此。风景稍胜。

西行四十五里至高家堡，静宁所辖。路入坡岭，登降者屡。

西行四十五里至青家驿，驿隶会宁县。坡岭益甚。

西行四十里至翟家所，亦隶会宁，坡岭犹多。中途过王家川，入山涧中，但见高岸深谷，一水潏洄若线，乍东乍西，时时褰涉，俗称为“七十二道脚不干”云。涧中土石多赤。

西南行，六十里至会宁县。水自东北涧中来，向西南涧中去。此中土石皆白，与前涧赤者异矣。县当其中，镇山之口。

西南行，六十里至西巩驿，安定县所辖。驿在坡岭高处，乏水。

西三十里至清凉山。自西巩启行，即越深涧；登冈阜，渐入清凉山。虽土质无巉岩石壁，而坡陡曲不一，其处遇雨则泥滑难行，商旅惮之。地亦乏水。

西行三十里至安定县。东西驿路，皆在山中。县城稍平坦。

西北行，六十里至秤钩驿，安定所辖。在高阜之上，路曲如秤钩，故名。

西行三十里至车道岭。此岭亦号难行，其陡曲与清凉山相似。

西北行，三十里至清水驿，金县所辖。途经坡坨尚多。

西北行，三十里至三角城，亦金县辖。杨柳垂街，荫渠水，颇有致。

西北行，三十里至猪嘴驿，仍金县辖，在西山下。林木森森，蔚然入目。盖数日来，童山如秃，求一木不可得见，至是始觉生趣盎然。

西北行，四十里至东关坡。猪嘴迤北，有所谓“九沟十八坡”者，土人呼为大狼山，纡曲上下，极隘处转侧而前。坡尽，则兰州在望矣。

西行二十里至兰州府。城东衢路荡平，直至坡下。目击园畦丛薄，点缀道旁，心为一畅。府城雄踞黄河南岸，五泉山在城南二里许，称名胜，游人不绝。城北黄流浩渺，自西而东，有二十四舟为浮桥，束水若带，两岸铁索系之，复用集吉草为巨纆，维舟属桥，渡者如履平地。北岸多酒楼，开窗临水，南望城郭，林树如画。惟岸上山楛，草木不生，仅有番僧寺宇耳。计自西安至兰州，共一千四百二十五里。

由兰州西北行，四十里至沙井驿，皋兰县所辖，在山涧中，南犹望见黄河。其地多赤土，而性疏易坍塌。涧水过此，则土之在地中者，往往塌陷似沙眼。

四望皆颓垣败垒，荒陋特甚，无寸草，土人以为古营盘地。土崖高处有帝君庙，碑云曾显应于此。寥寥数家，依庙而居。过数冈阜，忽见西南春树云生，参差掩映，兼有渠流引灌，满目青苍，乃平番之苦水驿也。由沙井西北行七十里，南折至苦水驿，平番县第一驿。甘省驿之多者莫如平番，有八驿焉，此其最东之驿。地名苦水，而水味实甘，惟色稍浊。原田万顷，灌溉饶沃。

西行五十里至红城驿，平番第二驿。傍山椒而行，土色尽赤，沿流绿树甚多。

北行四十里至南大通镇，路平。再三十里至平番县。县有二城：一为庄浪，满兵驻守；一为县治，相距五里许，县在庄浪城之北。有孔道二：西行为赴西宁路，北行为赴凉州路。西郭外，商民错处。雨缨，其土产也。

由平番北行，三十里至武胜驿，平番第三驿。起苦水、红城，过平番，至武胜，村落衔接，水木清腴，民居丰实，市阁纵横。所过之地，遍生草兰，马足芬芳，为西来第一沃壤。武胜之水，流出山口，清湛可鉴毛发。

西行四十里至岔口驿，平番第四驿。地居险要，面面皆山。驿南有一山突起，巖若削。番民散处两山中，帽以毡为质，而檐微窄，男女皆然；女番项背系白色带垂之。男著皮靴，女则赤脚而已。其人即古之羌种，自平番界至西宁口内外，种落极多。

由岔口西北行，五十里至镇羌驿，平番第五驿，为最西之境。途间过一河，见满山乱石。度乌梢岭，峻甚，地气极寒。

西北行，六十里至黑松驿，古浪县所辖。前由武胜入山，数日程，皆在万山之中，势险隘，跋涉不易，气象亦甚荒劣，绝少草木，令人闷绝。此驿犹在山谷，直至今浪始出山耳。

由黑松西北行，三十里至古浪县，县城镇山口，如锁钥然。山势忽开，路亦平坦。城南水畔有巨石，上镌“天关玉□”四字，疑是“锁”字。又一石，名为甘酒石，疑即平泉醒酒石之类。或云研末服之，可愈心痛，未知然否。

北行六十里至靖边驿，亦古浪辖。从此驿起至永昌县之水磨关，二百五十余里，路虽平，然皆碎石子，与车轮相触，隆隆然竟日不已。

由靖边北行，四十里至大河驿，此武威县辖也。驿东北有一路，设台站，

可出宁夏，达归化城、至京师，为边外文报所经，不须由兰州、西安迂道矣。

由大河西北行，三十里至凉州府。府城势夤敞，面山而居。其山巖崿绵亘，自塞外来，即古祁连山。顶皆积雪不消，盛夏日暖，稍稍化水，流入沟渠，引以溉田，为自然之利。自此西去，雨泽率少，惟恃雪水入田。盖河西自古富饶，皆以此耳。

由凉州西北行，五十里至怀安驿，驿隶武威。

西北行，二十里至丰乐铺。又二十里至柔远驿，亦隶武威。驿东有振武将军孙思克碑，康熙间名将。

西北行，三十里至三十里铺。再三十里至永昌县。风景闲旷，似静宁州。

西行三十里至水磨关。过此村，碎石子路始尽。然渐登冈阜，非复平路。

西北行，四十里至水泉驿。水磨关既过，约二十里许有一带沙冈，横亘南北，无寸草。中途有王将军进宝祠，亦康熙间名将。此驿为永昌所辖。

西行五十里至峡口驿。驿隶山丹县，以两山夹峙得名。地居山口，艰于水。山涧有一泉，取饮焉，约二里许。自凉州西来，折而北，所过随山筑墙，远近高低不一，土人呼为长城。然秦、隋所筑，西起临洮，在今兰州、狄道之境。盖以黄河为天堑，安得至此，况秦时凉州为匈奴所据耶？此疑明时防守故垣耳。边墙之外，为阿拉善蒙古游牧之所，即古贺兰山也。

由峡口北行，四十里至新河驿，亦隶山丹，并无河。或驿路不经欤？

西行四十里至山丹县。焉支山在县之北，即汉时匈奴所歌“夺我焉支山，使我妇女无颜色”者也。县虽山僻，城有流水，风景尚佳。

西行四十里至东乐驿。张掖县丞驻此分治。路多沙石。

西行三十里至仁寿驿，张掖所辖。亦沙石路，途中过一河。

西行四十里至甘州府，古张掖郡也。茂林荟蔚，水亦清。天山、黑水，俱在境内。天山即祁连山。

西北行，五十里至沙井驿。此又一沙井，张掖所辖。驿西二十里，地名沙河。又十余里为九眼泉墩，泉流甚细，绿草蒙茸，川原平旷，牛羊散啮草间，有野趣。过此，则碱卤地，不堪寓目。